



Inzko: Odmaknuti se od polariziranih pozicija i krenuti ka kompromisu

"Napredak na putu ka EU i dalje je deklarirani cilj bosanskohercegovačkih lidera iz svih etničkih grupa. U posljednje vrijeme bili smo svjedoci značajnih početnih koraka u tom pravcu, ali ostaje puno toga što treba uraditi," rekao je visoki predstavnik Valentin Inzko na okruglom stolu u Washingtonu pod nazivom "BiH – na putu ka evropskoj budućnosti." Domaćini okruglog stola bili su Fakultet za međunarodne studije (*School of Advanced International Studies – SAIS*) Univerziteta Johns Hopkins i Centar za transatlantske odnose.

U svom obraćanju, visoki predstavnik je istaknuo pitanja koja treba riješiti, uključujući i poštivanje Daytonskog mirovnog sporazuma, osobito njegovog Aneksa 4, odnosno Ustava: "Bosna i Hercegovina je decentralizirana država i to će i ostati, osim ako ne dođe do ustavnih promjena sa kojima se slažu svi narodi. Ali, reći da nema države Bosne i Hercegovine ili osporavati nadležnosti države u oblastima kao što je vanjska politika ili međuentitetska provedba zakona je pogrešno i štetno za pomirenje i za buduće reforme."

Visoki predstavnik je kao jedan od problema naglasio i pogoršanja u oblasti vladavine prava: "Daytonski mirovni sporazum definira Bosnu i Hercegovinu kao državu koja se rukovodi 'vladavinom prava', i mi se, kao međunarodna zajednica, trebamo ponovo angažirati i osnažiti svoje napore na jačanju vladavine prava, između ostalog i kroz jačanje borbe protiv korupcije. To bi pomoglo da se osnaže evroatlantske integracije."

"Izabrani lideri koji su izrazili opredjeljenje za integraciju u EU treba da se odmaknu od polariziranih pozicija i ubrzano traže kompromise koji su neophodni da se usvoje potrebne reforme. Sa stanovišta međunarodne zajednice, možemo i trebamo podržati sve koji su za Bosnu i Hercegovinu kao stabilnu, funkcionalnu i prosperitetnu državu, nepovratno integriranu u evropske strukture," zaključio je visoki predstavnik.